

摛藻堂四庫全書薈要

經部

欽定四庫全書薈要

經部

日講書經解義卷六

詳校官祭酒臣韋謙恒

欽定四庫全書

日講書經解義卷六

經部

周書

周文王國號武王克商因以為有天下之號此書凡
十一篇記周家一代之政事故曰周書

泰誓上

武王伐紂史錄其誓師之言以其大會孟津因以泰
誓名之泰大也此是上篇乃未渡河以前之文

惟十有三年春大會于孟津王曰嗟我友邦冢君越我
御事庶士明聽誓

此二節書首節見武王得人心之同次節是喻衆以
伐紂之意且欲其聽之審也孟津今河南府孟津縣
友邦隣接交好之國家君各國嗣立之君越猶及也
御事治事之人庶士衆士卒也史臣敘曰周武王即
侯位之十有三年孟春之月以商紂無道舉兵伐之
至于孟津天下諸侯不期而來會者八百國于是武

王將發旣師之言先歎息曰今我友邦冢君列國諸侯共舉義兵至此及我本國治事之卿大夫與衆士卒凡相從軍旅者俱宜聽我旣詞以見伐商之意夫武王所以呼從征之人諄諄于聽旣者蓋欲明其順從人心救民水火而非好大喜功輕于興師動衆也惟天地萬物父母惟人萬物之靈亶聰明作元后元后作民父母

此一節書言天立君為民之意以明紂之可伐也亶

者誠實之意元后大君也武王旣師曰天地之于萬物論其形勢若相懸殊然乾元資始有父道焉坤元資生有母道焉其長養愛育之心如父母之于子是天地乃萬物之父母也萬物雖並生于天地之間惟人得氣之秀比于衆物心為獨靈是人乃天地之所厚者也人類之中又篤生一聰明之聖人比于衆人最秀而最靈者立之為大君以統御萬民是君又天地之所獨厚者也然天之立君豈徒尊崇富貴之哉

正欲其體乾父坤母之心行子育萬民之政撫恤愛
養亦如父母之于子是元后又代天地而為民父母
者也夫天地生物而厚于人天地生人而獨厚于聖
其所以獨厚于聖者惟欲其恩養斯民體天地父母
之心而已然則任元后之責者可不知所以作民父
母之義乎

今商王受弗敬上天降災下民沈湎冒色敢行暴虐罪
人以族官人以世惟宮室臺榭陂池侈服以殘害于爾

萬姓焚炙忠良刳剔孕婦皇天震怒命我文考肅將天威大勲未集

此二節書是武王數紂慢天虐民之罪也受商紂名沈湎溺于酒也冒色冒亂女色也族族屬也世世代也臺上架屋謂之榭水邊隄障謂之陂焚炙燒烙也剗剔割剝也文考指文王武王曰天之立君原使為民父母今商王受居元后之位乃侮慢自恣不敬上天肆行無道降災下民試舉其大者言之其荒淫則

沈溺于酒而不復出冒亂于色而不知止其凶忍則
敢行暴虐之事無所顧忌加罪于人不但誅其一身
并其族屬而刑戮之其用人則不論賢否但其心之所喜即并其子弟親屬悉寵任之其所務者惟在瓊宮瑤室高臺廣榭築陂障鑿池沼與凡侈靡諸事竭民之財窮民之力以殘害于爾萬姓不但此也又為炮烙之刑焚炙忠良諫諍之臣剗剔孕婦以觀其胎其殘忍暴虐至于如此是以皇天震怒命我先人文

考敬將天威往伐其罪以救民于水火之中所惜者文考遽崩大功猶未成就耳然則上奉天心仰成先志征伐之舉豈得以自己哉

肆予小子發以爾友邦冢君觀政于商惟受罔有悛心乃夷居弗事上帝神祇遺厥先宗廟弗祀犧牲粢盛既于凶盜乃曰吾有民有命固懲其侮

此一節書是武王追敘觀政于商而紂怙惡不悛也肆字解作故字發武王名悛悔改也夷蹲踞也既盡

也武王曰惟文考之功未成故我小子發欲伐商以
終其事然猶未遽伐之也嗣位以來十有三年昔嘗
以爾友邦冢君之向背觀商政之得失何如使其改
過自新則我亦將不復以征伐為事矣乃受絕無悔
悟改過之心夷踞而居忽慢天地神祇不知奉事遺
棄祖先宗廟不行祭享凡祭祀所用犧牲粢盛盡被
凶惡盜賊之人攘竊而去其慢神如此乃猶曰我有
民社我有天命以此自恃而無有懲戒其侮慢之意

夫觀商之政如此則其惡終不可改而我之兵終不容已矣

天佑下民作之君作之師惟其克相上帝寵綏四方有罪無罪予曷敢有越厥志

此一節書是武王自任君師之責以見伐商之不容已也佑助也相謂左右之也寵愛也綏安也越猶過也武王曰上天佑助下民為之君以長之為之師以教之天之所以立為君師者惟以其能助上帝之不

及以寵安四方之民此天所以立之也受失君師之道則君師之責在我而克相寵綏之道有不容不盡者有罪當討一奉天以討之無罪當赦一奉天以赦之何敢過用其心而擅為好惡于其間乎商受之罪正天討所不赦者故我不敢違天之意縱有罪而不誅也

同力度德同德度義受有臣億萬惟億萬心予有臣三千惟一心

此一節書是即人事以明伐商有必克之理也度量
度也同力度德同德度義此二句古者兵志之詞也
十萬謂之億武王曰我聞兵志有云凡兩軍相對若
彼此兵力齊等則較量其平日孰行善而為有德孰
行惡而為無德德勝則雖有力者亦不能與之敵矣
若彼此德行相等則又較量其臨時孰兵出有名而
為義孰兵出無名而為不義義勝則雖有德者亦不
能與之敵矣夫兵家勝負之形可決如此今以商周

之力較之受之臣子雖有億萬之衆然亦億萬其心
雖多亦不足恃也我之臣子雖止有三千然其心却
是一心其心既一以此赴敵何敵不摧乎是較其兵
力已不勝我也又何論德與義哉信乎伐商之必克
也可見失人心則雖強亦終為弱得人心則雖寡亦
能勝衆聯屬人心之本非修德行仁何以哉

商罪貫盈天命誅之予弗順天厥罪惟鈞予小子夙夜
祗懼受命文考類于上帝宜于冢土以爾有衆底天之

罰

此二節書是言天命伐商有必往之勢故稟文王之
命而致天之伐也貫通也盈滿也鈞猶言同夙早也
類者祭天之名以其禮與郊祀相類故謂之類宜者
祭地之名祭后土以求福宜故謂之宜冢土后土也
底解作致武王曰今日伐商蓋亦事勢所不容已耳
使商罪未極天心未厭則我之征伐猶為可已今受
窮兇極惡其罪已貫通盈滿矣天厭其罪命我誅之

我若不順天行誅是容縱惡人抗違天命也其罪不與受鈞乎故我小子畏天之威早夜敬懼以伐商之舉天本命我文考乃先受命于文考之廟又行類禮于上帝求福宜于后土皆以伐商之事告之于是率爾有衆致天之罰于商蓋將求免夫惟鈞之罪非出于輕動也爾衆其念之哉蓋奉天伐暴聖人初無利天下之心故湯之伐桀曰予畏上帝不敢不正武王之伐紂曰予弗順天厥罪惟鈞其義一也

天矜于民民之所欲天必從之爾尚弼予一人永清四海時哉弗可失

此一節書是旣師將終又致其勉勵之意也矜憐憫
也弼輔佐也武王曰惟天居高聽卑常有矜憐下民
之意凡民情所欲天必鑒而從之民欲平禍亂即為
之平民欲去疾苦即為之去今民欲止商如此則天
意可知凡爾有衆庶幾輔我一人除其邪穢永清四
海夫兵貴乘時今日正天人合應之時也苟失此時

則上拂乎天下拂乎人而撥亂反正無日矣爾等可
不乘時以立事哉易稱湯武革命順乎天而應乎人
蓋聖人之兵體天意察民心而又度時宜不得已而
後動耳豈有利天下之心哉

泰誓中

此泰誓中篇乃史臣記武王伐紂既渡河誓師之辭
惟戊午王次于河朔羣后以師畢會王乃徇師而誓曰
嗚呼西土有衆咸聽朕言

此二節書是記武王河朔撫師而先警衆人之聽也
次止也河朔河之北也羣后列國之君徇者拊循之
意史臣曰武王自孟春丁巳日會兵伐商至于戊午
日從孟津渡河暫駐于河北地方是時列國諸侯之
兵亦于此畢會聽武王號令武王乃拊循其衆發令
以撫戒之先嘆息曰嗚呼凡從我自西方而來之衆
皆當聽我之言夫以拊循而慰之者恩也以軍法而
誓之者威也孟津之誓言友邦冢君御事庶士先諸

侯而後西土者明尊卑之分也此先及西土者立法
自近始也武王之兵雖曰順天應人其用兵有法亦
可見矣

我聞吉人為善惟日不足凶人為不善亦惟日不足今
商王受力行無度播棄犁老昵比罪人淫酗肆虐臣下
化之朋家作仇胥權相滅無辜籲天穢德彰聞

此一節書是先舉古語而後數商受之惡也無度無
法度也播放也犁字與黧黑之黧通用是老人面上

顏色醜是醉後發怒無辜謂無罪之人籲天告天也
武王曰我聞古人有言凡為善之吉人其心惟在于
善雖終日為善猶以為未足也凡為惡之凶人其心
亦惟在於惡雖終日為惡猶以為未足也今商王受
其所勉力而行者皆不循法度之事老成之臣所當
親近者乃放棄之罪惡之人所當斥逐者乃親比之
又且淫于色醜于酒縱肆威虐以戕害于百姓此正
所謂凶人為不善亦惟日不足也在下之臣子見受

之所為如此亦相與習染化而為惡各立朋黨互為仇讐脅上權力以相誅滅其毒流于天下使無罪受害之人無處控訴呼天告冤故其腥穢之德顯聞于天耳夫天道福善禍淫豈能容此凶人哉

惟天惠民惟辟奉天有夏桀弗克若天流毒下國天乃佑命成湯降黜夏命惟受罪浮于桀剝喪元良賊虐諫輔謂已有天命謂敬不足行謂察無益謂暴無傷厥監惟不遠在彼夏王天其以予乂民朕夢協朕卜襲于休

祥戎商必克

此二節書是先即夏事以喻商受之必亡後即天意以明伐商之必克也浮猶言過也剝落也失位去國謂之喪元良指微子諫輔指比干監視也協合也襲重也休祥吉兆也戎商謂加兵于商武王曰惟天惠愛下民立君以長之立師以教之惟為人君者居天之位治天之民必當仰體天心以盡君師治教之責庶乎不負上天立己之意也昔有夏之君桀不克順

天惠民乃恣為淫虐流毒于下國于是天心厭之乃佑命商王成湯假手以誅之而降黜夏命遷于有商今商王受之罪比之于桀則又過之如微子者商之元子又有賢良之德彼乃遺落之使失位而去比干者以直諫匡救彼乃加以殘虐之刑至于剖心而死天心久厭其惡彼則自謂已有天命君德莫大乎敬彼則謂敬為不足行祭祀者朝廷大典彼則以為無益暴虐者人君大惡彼則以為無傷夫前人之成敗

乃後人之明鑒商之所鑒視者初不在遠惟在彼夏
王桀耳今日上天之意殆使我伐商以治民也且我
于興師之時嘗得吉卜又嘗得吉夢夢與卜合重有
休祥之應此皆默有天意非偶然也以是知伐商之
兵斷乎其必勝矣

受有億兆夷人離心離德又有亂臣十人同心同德雖
有周親不如仁人

此一節書是即人事以明伐商之必克也十萬謂之

億十億謂之兆夷解作平謂平常也亂臣能治亂之
臣周親至親也武王曰用兵勝負視其人材何如今
受所統雖有億兆之衆然皆尋常平等之人且離心
離德不相聯屬我所有撥亂反正之臣雖止十人然
皆盡忠報主與我一心一德是受之衆不如我之寡
也受所親信者雖有同姓至親然皆凶人醜類同惡
相濟我之十臣雖不盡是我之親戚然皆是仁厚有
德之人可以經邦濟世除暴安民是受之親不如我

之疎也商周之勝敗不于此而可決也哉

天視自我民視天聽自我民聽百姓有過在予一人今
朕必往

此一節書是合天人而言之知伐商有必克之理也
武王曰天久一理善觀天者驗之於民而已今夫天
雖未嘗有目以視人而于人之善惡無所不見者亦
自我民之視以為視也雖未嘗有耳以聽人而于人
之是非無所不聞者亦自我民之聽以為聽也今天

下之百姓皆過責于我一人之身言我不能往正商
罪救民于水火之中民情如此則天意可知苟不能
慰民之心則不能順天之意將無以成求清之功而
不免于惟鈞之罪矣今日伐商之往豈我所容已哉
我武惟揚侵于之疆取彼凶殘我伐用張于湯有光
此一節書是表已伐商之公心也揚奮揚也侵入也
疆謂疆界凶殘指紂言武王曰我之伐商既在所必
往則所以威武奮揚以侵彼商受之疆界者正以商

受暴虐天下患之故欲取彼凶殘以拯民于水火之中于以建永清之烈予以成未集之勲而殺伐之功因以張大焉耳昔湯之降黜夏命由桀之弗克順天湯之心固公天下之心矣今我之取彼凶殘由受之罪浮于桀則于湯之心豈不益顯于天下乎夫武王伐湯之子孫覆湯之宗社謂之湯讐可也而曰于湯有光蓋古之聖人皆以公天下為心類如此

歟哉夫子罔或無畏寧執非敵百姓惶惶若崩厥角鳴

呼乃一德一心立定厥功惟克永世

此一節書是勉將士圖伐商之功也勗勉也夫子指衆將士武王曰勉哉爾等將士無或以受為不足畏寧執心以為非我所敵常存戒懼之意可也所以然者何也今商之百姓畏受之虐懷惶乎若崩摧其頭角然人心危懼如此所望者惟此一舉而可以忽心乘之乎嗚呼爾等將士其同以除暴救民為德同以除暴救民為心一戰勝商立定其功則庶幾民無懷

懷之危而得以久安于斯世矣夫武王旣誓師既曰戎
商必克又曰寧執非敵既曰予有亂臣同心同德又
曰乃一德一心聖人之重用民命臨事而懼如此

泰誓下

此泰誓下篇史臣記武王伐紂既渡河將趨商郊旣
誓師之辭

時厥明王乃大巡六師明誓衆士王曰嗚呼我西土君
子天有顯道厥類惟彰今商王受狎侮五常荒怠弗敬

自絕于天結怨于民

此二節書是敘武王將趨商郊巡師誓衆而先言受之天棄民怨也厥明是明日大巡周徧巡視也六師六軍也西土君子指西方從征之將士顯道明顯之道五常五倫也即指顯道言史臣曰武王既以戊午日次于河朔至于明日將趨商郊去敵甚近乃大巡六師按行軍壘然後曉然發令誓戒衆士歎息而言曰嗚呼凡從我而來西方之君子各宜知悉上天有

明白顯著之道曰仁曰義曰禮曰智曰信此五者之道各有攸屬或以天合或以人合一倫一理截然不混其類甚為彰明為君者敬守此道以為法于天下可也今商王受乃狎侮此五常之道荒棄怠惰全然不敬上則自絕于天而天棄之下則結怨于民而民畔之天怒民怨如此我安得不奉天順人以討之哉斷朝涉之脰剖賢人之心作威殺戮毒痛四海崇信姦回放黜師保屏棄典刑囚奴正士郊社不修宗廟不享

作奇技淫巧以悅婦人上帝弗順祝降時喪爾其孜孜奉予一人恭行天罰

此一節書是述紂狎侮五常自絕於天之事也斷砍斷也朝涉清晨渡水也脛脚骨也賢人指比干痛病也姦回姦邪之人也正人指箕子婦人指妲己祝解作斷武王曰商王受於冬月見人早晨涉水疑其脛何故耐寒乃研而觀之惡賢人比干強諫怒曰吾聞聖人心有七竅遂剖比干之心而觀之大作刑威任

意殺戮以毒病四海之人其所崇信者皆是姦邪小人其所放黜者乃在師保重臣先王之典章法度則屏棄之而不用正士如箕子者則拘囚之以為奴郊社所以事天地而不行修舉宗廟所以事祖宗而不行享祀惟專作奇異之技術淫侈之巧物以媚悅所幸之婦人夫剖賢人囚正士是無君臣之義也不享宗廟是無父子之恩也放逐師保是無師友之禮也媚悅婦人是無夫婦之道也商王之悖亂天道以有

絕于天如此故上天不順其所為而斷然降是喪亡
爾衆士其可不勉力不怠奉我一人以敬行天罰哉
古人有言曰撫我則后虐我則讎獨夫受洪惟作威乃
沒世讎樹德務滋除惡務本肆予小子誕以爾衆士殄
殲乃讎爾衆士其尚迪果毅以登乃辟功多有厚賞不
迪有顯戮

此一節書是言紂結怨于民而勉將士之盡力也后
君也獨夫謂孤立無助之人指紂言樹德務滋除惡

務本二句亦古語也肆發語詞誕大也殄絕也殲滅也廸字解作蹈字殺敵謂之果致果謂之毅登成也乃辟汝君也武王曰我聞古人有言曰小民之情向背無常以恩撫我則愛戴之為君上以威震我則疾視之如寇讎由此言觀之今孤立無助如商王受者大作威虐以殘害于爾百姓是乃爾之世讐也寧復可為汝君乎我又聞古人曰欲樹立人之德則務其滋長欲除去人之惡則務絕根本今商王受正衆惡

之本所當急去者也故我小子大以爾等衆士問受
之罪務殄絕殲滅爾之世讐爾等衆士其蹈行果毅
無有畏避無有中止以成爾君弔民伐罪之功可也
爾若功績衆多則我有厚賞非特一爵一級而已爾
若不蹈行果毅則必有顯戮以示衆庶爾等可不思
策勲定難以自免于罪戾哉

嗚呼惟我文考若日月之照臨光于四方顯于西土惟
我有周誕受多方

此一節書是述文王之德為天人之所歸也西土指
岐周豐鎬之地多方萬方也武王曰商王受之惡天
人共棄之如此有必亡之勢矣爾等亦知我周有必
興之理乎嗚呼當商之季惟我文考能率典以敬天
修政以仁民其德之輝光譬如日月之明照臨下土
東西朔南之遠光無不被而岐周豐鎬地為至近故
其德為尤顯文考之德其所及如此是以人心戴之
天命歸之惟我有周宜其大受多方而有天下也夫

我有文考之德為之憑藉天下之大自不能舍而他適矣爾衆之輔我伐商也又何疑哉

予克受非予武惟朕文考無罪受克予非朕文考有罪惟予小子無良

此一節書是善則稱親過則歸已聖人之臨事而懼也武王曰我文考之德既足以興邦今日之事惟憑藉先德而已故我能勝受非我之威武足以取天下也乃惟我文考有德無罪故為天所佑而庇及後人

耳若不幸而受能勝我非我文考之有罪不足以得天下也乃惟我小子德薄無良故為天所譴而辱及前人耳我與爾衆士其共勉之哉泰誓中篇之末稱湯下篇之末稱文考蓋論萬古大義則武王于湯任再起之責者也論一家世德則武王于文王任成終之責者也遠則欲無愧于湯近則欲無忝于文考武王所以臨事而懼也

牧誓

史臣記武王伐紂兵至牧野臨戰捨師之辭以牧捨
名篇

時甲子昧爽王朝至于商郊牧野乃捨王左杖黃鉞右
秉白旄以麾曰逖矣西土之人

此一節書是敘武王軍于牧野將捨師而先慰勞之
也甲子是二月初四日昧爽天將明未明之時也牧
地名在商之郊外即今河南衛輝府城南鉞斧也黃
鉞以黃金為飾者也逖遠也史臣曰時二月四日甲

子黎明之時武王至于商郊牧野之地乃發誓命以戒勉將士武王左手持黃金所飾之鉞右手持白旄以指麾軍中曰爾等皆西土之人我以伐暴救民之故率爾至此其行亦已遠矣武王此言蓋慰衆之勞而啓其聽愽之心也

王曰嗟我友邦冢君御事司徒司馬司空亞旅師氏千夫長百夫長及庸蜀羌髳微盧彭濮人稱爾戈比爾干立爾矛予其誓

此三節書是武王歷呼從征之人而欲其聽之審也
友邦相隣交好之國家君各國嗣立之君御事執事
之人司徒司馬司空為三卿亞大夫也以其為卿之
次故謂之亞旅士也以其人衆故謂之旅師氏官名
掌扈從宿衛之事千夫長統千人之帥百夫長統百
人之帥也庸蜀羌黎微盧彭濮西南夷八國名稱舉
也戈矛皆鎗類比並列也干盾也即今之遮牌武王
曰嗟哉我鄰國之諸侯與我本國治事之臣司徒司

馬司空亞大夫衆士師氏之官千夫之長百夫之長及庸蜀羌羃微盧彭濮八國之人皆執汝之戈排列汝之干樹立汝之矛我將發誓命以告汝宜審聽之夫武王伐紂本仁義之師而又器械嚴整士氣精明于誓師之時已可以不戰而屈人矣

王曰古人有言曰牝雞無晨牝雞之晨惟家之索今商王受惟婦言是用昏棄厥肆祀弗答昏棄厥遺王父母弟不迪乃惟四方之多罪逋逃是崇是長是信是使是

以為大夫卿士俾暴虐于百姓以姦宄于商邑
此二節書是引古語以聲商王之惡也牝雞是母雞
晨報曉也索謂蕭索婦指妲己肆陳也答報也王父
祖也母弟同母之弟廸道也武王誓師曰我聞古人
有言曰牝雞無晨鳴之理若牝雞晨鳴其家必至破
敗蕭索可見陰陽有定分內外有定體婦人不可以
預外事亦猶牝雞不可司晨也今商王受乃惑于妲
己好惡賞罰惟其言是用所謂牝雞司晨也因此顛

倒昏亂棄其所當陳之祭祀而不知報答棄其先王所遺同祖之弟與同母之弟而不能以道善遇之乃惟四方多罪逃亡之人尊崇而長養之親信而任使之以是人為大夫鄉士使脅權肆毒加暴虐于百姓倚勢犯法作姦宄于商邑牝雞晨而家索婦言用而國亡其理蓋有必然者矣

今予發惟恭行天之罰今日之事不愆于六步七步乃止齊焉夫子勗哉不愆于四伐五伐六伐七伐乃止齊

焉勗哉夫子尚桓桓如虎如貔如熊如羆于商郊弗迂
克奔以役西土勗哉夫子爾所弗勗其于爾躬有戮
此四節書是勉衆以節制之法臨陣之勇撫衆之仁
也發是武王名愆過也步進趨也伐擊刺也夫子謂
衆將士勗勉也桓桓威武貌虎貔熊羆四種猛獸也
迓迎擊也奔是奔來降者武王曰商王受聽用婦言
肆行無道如此今我小子發興兵伐商惟以敬行天
罰而已非不得已而用之也故今日之事當以節制為

尚不以多殺為功其進而迎敵不過于六步七步即
便止駐以整齊部伍然後復從而伐之爾將士勉哉
無或乘勝而輕進也其戰而殺敵少不過于四伐五
伐多不過于六伐七伐即便止駐以整齊部伍然後
復從而伐之勉哉爾將士無或乘怒而貪殺也爾將
士其振桓桓之威如虎如貔如熊如羆以奮擊于商
郊之地不可少有退怯也然過勇則不免于濫殺惟
當于凶殘者取之抗拒者誅之若有奔走來降者勿

迎而擊之以勞役我西土之人勉哉爾將士其武勇是奮而殺降是戒可也爾將士若于我之命而有所不免或輕進或貪殺或無勇而殺降是違號令而失紀律也則軍有常刑必戮及爾身罔有攸赦矣可不戒哉按泰誓之辭曰元后作民父母曰惟天惠民惟辟奉天曰天其以予乂民乃知聖人不得已而動衆興師除殘去暴凡以為生民計也故征伐所及必先以安民為首務

武成

史臣記武王自伐商以至歸周始終規模次第以總敘武功之成而以武成名篇

惟一月壬辰旁死魄越翼日癸巳王朝步自周于征伐
商底商之罪告于皇天后土所過名山大川曰惟有道
曾孫周王發將有大正于商今商王受無道暴殄天物
害虐烝民為天下逋逃主萃淵藪予小子既獲仁人敢
祇承上帝以遏亂略華夏蠻貊罔不率俾惟爾有神尚

克相予以濟兆民無作神羞

此二節書是史臣記武王伐商興兵之期與告神之事也一月是建寅之月不曰正而曰一者商建丑以十二月為正朔故曰一月也旁是近魄是月體黑暗處每月朔後則明生魄死故初二日謂之旁死魄翼日明日也底商之罪是極數商紂之罪惡有道是周家先世祖父有道德者逋逃罪犯逃避之人也略謀略也俾解作從史臣曰惟一月建寅之月初二日壬

辰旁死魄越明日癸巳武王于是日之朝步自宗周
舉兵往征伐商受乃極數受之罪惡告于皇天后土
及所過名山大川之神其祝辭曰惟我周家先世有
道之曾孫周王發將欲興師大正有商之罪今商王
受雖居君位而無君道天物者天生之以資人用者
也受則暴恣殄絕而不知愛惜衆民者邦之本也受
則酷害殘虐而不知撫養天下有罪在逃之人所當
誅鋤之以安良善者也受反収留之與彼為主有司

莫之敢捕如魚之聚于深淵獸之聚于林藪此皆商
受之罪上帝所怒不可不正者也今我小子既得仁
厚有德之人為之輔佐敢敬承上帝之意為伐罪弔
民之舉取彼凶殘遏絕亂謀惟時內而華夏外而蠻
貊無不相率順從我周同力伐商然兵凶戰危我小
子何敢自恃惟爾天地山川之神其尚于冥冥之中
輔我戰勝攻取以救濟兆民出諸水火毋使為商所
勝以貽爾神羞辱可也

既戊午師逾孟津癸亥陳于商郊俟天休命甲子昧爽受率其旅若林會于牧野罔有敵于我師前徒倒戈攻于後以北血流漂杵一戎衣天下大定乃反商政政由舊釋箕子囚封比干墓式商容閭散鹿臺之財發鉅橋之粟大賚于四海而萬姓悅服

此一節書是記武王克商之節次與夫定商之規模也陳字與陣字通用休命上天休美之命也若林人衆如樹林也北敗走也杵是木杵箕子諫紂不聽佯

狂為奴身被囚繫比干強諫剖心而死商容賢臣為
紂所廢式謂在車上俯身憑軾以致敬也閭族居里
門也鹿臺鉅橋紂藏積錢糧之所大賚普施恩澤也
史臣曰武王率伐商之師于戊午日東渡孟津河癸
亥日列陳于商郊頓兵少息以待天之美命甲子日
黎明之時商受率其軍旅衆多如林與武王會戰于
牧野之地然受兵雖多無向前與我周師為敵者其
前列卒徒反顛倒其戈自攻在後之人受之兵遂至

于大敗奔走蹤踐自相屠戮血流遍野雖木杵在地亦因而漂起所以武王之兵但一被甲而天下遂已大定無事于再舉之勞蓋以至仁伐至不仁其易如此于是改革商受所行虐政其政皆由商先王之舊釋太師箕子之囚封少師比干之墓遇賢人商容之間則式而敬之鹿臺之財則散之以賙貧乏鉅橋之粟則發之以賑飢民大施恩澤于四海而萬姓之衆無不心悅誠服愛戴武王願其長為生民之主也

厥四月哉生明王來自商至于豐乃偃武修文歸馬于華山之陽放牛于桃林之野示天下弗服

此一節書是記武王偃武之事也哉字解作始字初三日月始生明故謂之哉生明豐周之舊都華山桃林皆地名服用也史臣曰武王先以一月二日自周伐商至是四月三日月始生明之時自商而來歸至于豐乃偃息威武而修舉文德凡所用之戰馬皆發歸于華山之陽任載之牛皆牧放于桃林之野明示

天下之人使知自今以往與百姓同享太平不復興兵動衆矣蓋是時商政暴虐雖望時雨之師而人心厭亂終苦干戈之擾故武王汲汲于偃武修文如此可見用兵非聖人之得已也

既生魄庶邦冢君暨百工受命于周丁未祀于周廟邦甸侯衛駿奔走執豆籩越三日庚戌柴望大告武成此二節書是記武王朝觀以嚴正始之道祀神以告武功之成也每月望後則月體黑魄復生故謂之既

生魄庶邦冢君四方諸侯也百工卿大夫也駿速也豆籩祭器燔柴祭天也望望祀山川也史臣曰當四月望後月既生魄之時四方諸侯及在朝百官皆推戴武王為天子相率而受命于周蓋武王至是始代商而為天下主也乃擇丁未之日舉祀典于祖廟近而邦甸遠而侯衛莫不速奔走執豆籩來助祭于廟越三日庚戌又燔柴祭天望祀山川蓋前者伐商曾受命于先王祈助于神祇至是天下已定故次第

舉行郊廟之祀用大告武功之成且以謝答神佑也王若曰嗚呼羣后惟先王建邦啓土公劉克篤前烈至于大王肇基王迹王季其勤王家我文考文王克成厥勲誕膺天命以撫方夏大邦畏其力小邦懷其德惟九年大統未集予小子其承厥志

此一節書是記武王歷敘王業之所由成以聳動諸侯也羣后衆諸侯也先王指后稷誕大也膺受也方夏謂四方華夏之地武王告諭諸侯歎息而言曰嗚

呼爾等羣后其審聽之昔我先王后稷在唐虞時能教民稼穡始受封為諸侯建邦開國于有邰之地傳至公劉又能篤厚前人功烈至太王去邠居岐始基立興王之迹至王季能勤勞王家至我文考文王乃能成就其功實已大受上天之命以撫安方夏之民當時大國諸侯皆畏懼文王之威力而不敢放肆小國諸侯皆懷念文王之恩德而賴以存立所謂克成厥功者如此惜乎九年而崩大統未集故今日我小子之舉不過承順先人之志以除暴安民而已

恭天成命肆予東征綏厥士女惟其士女篚厥玄黃昭我周王天休震動用附我大邑周

此一節書是見武王伐商之事上承天命下順人心也成命黜商之定命也肆解作遂綏安也士女男女也篚竹器玄黃色幣也附歸附也武王又曰天心厭矣故我敬順上天成命遂舉東征之師以安定商之

士女商之士女喜周之來皆用筐篚之器盛玄黃之
幣迎接周師以明我周王有弔民伐罪之德夫商之
民喜周之來非周有求于民而民有私于周也蓋上
天眷顧我周之休命默有以鼓舞乎斯民故民皆相
率以歸附我大周之國而奉幣以昭德自不容已耳
是歸周者民而所以使之歸者天也至是則大統已
集而文王之志亦于是乎成矣我周之有天下實由
祖宗締造有素而天命攸歸豈我之功哉

列爵惟五分土惟三建官惟賢位事惟能重民五教惟食喪祭惇信明義崇德報功垂拱而天下治

此一節書是記武王致治之本末也垂拱是垂衣端拱無為之意史臣曰武王克商之後偃武修文之事不可悉數略舉其大者言之其列爵以五等公侯伯子男是也其分土以三等公侯百里伯七十里子男五十里是也其建立庶官則惟賢者用之而不賢者不得預也其居位任事則惟能者使之而無才者不

得濫也其所最重者君臣父子夫婦兄弟朋友五倫之教與夫力田足食死喪祭祀之禮也凡出一令必守之以信而始終不渝凡行一事必裁之以義而動無過舉有德者則尊顯之不敢蔽人之德有功者則酬報之不敢負人之功武王經理天下其弘綱大要盡善如此故不必有所作為但垂衣南面而天下自治矣武王致治之本末如此武王雖以征誅得天下然治定功成之後文德雍容亦自有唐虞間氣象觀

史臣所記端拱可見矣蓋治法詳于有為治化專于無為以天下爵土官賞予天下賢才功德以天下同然秉彝勵天下人心風俗堯舜無為之治不恍乎若覩哉

洪範

武王克殷訪問箕子箕子以洪範陳之洪大也範法也治天下之大法也故以洪範名篇

惟十有三祀王訪于箕子王乃言曰嗚呼箕子惟天陰

騶下民相協厥居我不知其彝倫攸叙

此二節書是記武王訪道于箕子之詞也王是武王訪問也箕是國名子是爵陰騶者默定之意彝倫常道也史臣曰惟武王十有三祀既克商而有天下乃屈天子之尊親就箕子而訪之蓋箕子商之賢人知古帝王治天下之道故武王以師禮尊之而不敢以臣禮待之也武王乃歎息而言曰嗚呼汝箕子惟天于冥冥之中默有以安定其民為之輔相保合其所

當居止之理天之為民何其厚也然是居止之理具于人心為秉彝由于人身為人倫天佑民而作之君固以敘此彝倫之責寄之于我矣我欲敘之而不知其所以敘之汝其明以告我可也蓋武王于得天下之初他務未遑而先敎敎于訪道之誠如此商曰祀周曰年稱十有三祀者順箕子之志是以存商人之號而不廢也就而問之者重道而忘勢也推本于天之陰隲下民而求彝倫之所以敘者思無負君師之

任也真可為萬世法矣

箕子乃言曰我聞在昔鯀陦洪水汨陳其五行帝乃震怒不畀洪範九疇彝倫攸斅鯀則殛死禹乃嗣興天乃錫禹洪範九疇彝倫攸敘

此一節書是箕子陳道于周武王而先言洪範九疇所由作也禋塞也汨亂也陳列也畀與也九疇九類也斅敗也箕子因武王訪道之誠乃答言曰帝王治天下之道具在洪範九疇此九疇者其原蓋出于天

我聞在昔唐帝堯時命鯀治洪水鯀逆水性作隄防以堙塞之夫水為五行之首一行亂則五行皆亂是汨亂上帝所陳列之五行矣故上帝震怒水患未平洛書不出不與鯀洪範九疇而治天下之大法隱而弗彰此常道之所以敗而失其敘也鯀既以罪殛死禹乃繼鯀而興順水性以治之至于地平天成五行順列由是天鑒禹之德乃于洛水中現出神龜背上
有文戴九履一左三右七二四為肩六八為足五居

于中禹因而次第其數條列治天下之大法其類有九謂之洪範九疇垂示天下後世燦然明備此常道之所以敘而無違者也今王欲知彝倫之敘亦于此九疇求之而已蓋九疇之原出于天堯舜皆已體備之自大禹著之為言使萬世人君昭然有所法守承天治民之道未有外于是者也

初一曰五行次二曰敬用五事次三曰農用八政次四曰協用五紀次五曰建用皇極次六曰乂用三德次七

曰明用稽疑次八曰念用庶徵次九曰嚮用五福威用六極

此一節書是箕子述禹所敘九疇之綱也農厚也言厚民生也協合也言合天道也建立也言立極也又治也言治民也明辨惑也稽疑用卜筮以考疑也念省驗也徵徵應也所徵應者非一故曰庶徵也嚮勸之使嚮慕也威懲之使畏懼也極窮也苦也箕子曰洛書之數有奇偶而無文字禹以人君治天下之大

法次第分配之書數始于一疇之初一曰五行蓋天
生五行為斯民日用所不可缺人君因天道而全民
用莫先乎此故配以第一疇書數自一而二疇之次
二曰敬用五事蓋五事本五行之氣而賦其理于生
人之身者也人君修身之要在敬以用之故配以第
二疇書數自二而三疇之次三曰農用八政人君創
制立法以厚民生惟八政是用焉修身斯可立政故
配以第三疇書數自三而四疇之次四曰協用五紀

人君治歷明時以合天道惟五紀是用焉王政必順天時故配以第四疇書數五居中位乃人君中天下而立之象疇之次五曰建用皇極蓋立乎大中至正為天下臣民標準上以奉若天心下以克綏民性治天下之大法皆于皇極統攝之故配以第五疇而居九數之中焉書數有六疇之次六曰乂用三德人君既以身立教而治道不可偏執必因時制宜用此三德以達乎治之中而後可納天下臣民于極此第六

疇也書數有七疇之次七曰明用稽疑人君成天下
之務吾心固有先見而決幾應變必用卜筮以斷天
下之疑此第七疇也書數有八疇之次八曰念用庶
徵凡人事之得失不齊則天道之徵應亦不一人君
當因其休咎用以省驗其行事此第八疇也書數終
于九疇之次九曰嚮用五福威用六極人君修身建
中自斂福而免極矣然欲使臣民向慕于為善必用
五福以勸之欲使臣民畏懼而不為惡必用六極以

懲之善惡之應盡于此故以第九疇終焉斯九疇自然之序天所以錫禹者神而禹所以垂示天下萬世者備矣合而觀之九疇之本在皇極故不言數而為衆數所由該前四疇以立其體後四疇以行其用人主欲敘彝倫以比隆二帝三王其惟皇極之體立而用行乎

一五行一曰水二曰火三曰木四曰金五曰土水曰潤下火曰炎上木曰曲直金曰從革土爰稼穡潤下作鹹

炎上作苦曲直作酸從革作辛稼穡作甘

此一節書是箕子所衍五行之疇也箕子曰九疇之一曰五行皆天地運行之氣化所生也萬物成形莫不由微而至著故五行之生序亦以微著為先後其一曰水天一生水形體最微故居一其二曰火地二生火形體漸著故居二其三曰木天三生木形體充實故居三其四曰金地四生金形體堅固故居四其五曰土天五生土體質最大故居五其序如此然各

具一質則各具一性水性潤澤而又下行曰潤下火性炎熱而又上升曰炎上木性屈曲而又聳直曰曲直金性可順從而又可改革曰從革土性則能生物而生物之德莫盛于五穀于是播種為稼收穫為穡焉既各有其性遂各有其味水惟潤下乃浸漬而為鹹火惟炎上乃焦灼而為苦木惟曲直則氣鬱而成酸金惟從革則氣烈而成辛土得陰陽之冲氣故稼穡性稟中和其味甘美此皆成于造化之自然而切

于民生之日用者財成以制其過輔相以補其不及
則在人君故治天下之大法必以此為首務也易曰
河出圖洛出書聖人則之故先儒言圖書相表裏八
卦一五行而易言陰陽不言五行陰陽即五行也九
疇一陰陽而洪範言五行不言陰陽五行即陰陽也
總之一太極而已

二五事一曰貌二曰言三曰視四曰聽五曰思貌曰恭
言曰從視曰明聽曰聰思曰睿恭作肅從作乂明作哲

聰作謀睿作聖

此一節書是箕子所衍五事之疇也。肅者嚴整也。乂者條理也。哲者智也。謀者度也。聖者無不通也。箕子曰九疇之二為五事。人稟五行之秀氣以生。故五事發見先後亦如五行之序。其一曰貌。初生時精之所凝。有形有色。而為貌。其潤澤屬水。故居一。其二曰言。既生後氣之所發。有聲有音。而為言。其發揚屬火。故居二。其三曰視。精顯于目。則遇物而能視。其敷散屬

木故居三其四曰聽氣藏于耳則感聲而能聽其收
斂屬金故居四其五曰思精氣聚于心則有知有識
而能思其通達屬土故居五蓋生序如此五事之體
既備而德自具貌之德齋莊中正謂之恭言之德順
理成章謂之從視之德無所不見謂之明聽之德無
所不聞謂之聰思之德心通乎微謂之睿五事之德
既具而用自彰貌惟恭則德容可畏可象而作肅言
惟從則德音有條有理而作又視有明之德則不蔽

于物理人情而作括聽有聰之德則不惑于是非可否而作謀思之德惟其睿則知來藏往而肅乂哲謀一以貫之故作聖人君用此五者主之以敬隨事盡理則身修而可以治人矣抑五事以思為尤要焉惟誠之于思則貌言視聽之際皆有以省察而持循之踐其形盡其性乃謂之敬用而建極之本在是所以聖治不外乎聖學也

三八政一曰食二曰貨三曰祀四曰司空五曰司徒六

曰司寇七曰賓八曰師

此一節書是箕子所行八政之疇也司空掌土司徒掌教司寇掌禁賓者賓禮諸侯遠人也師者師旅也箕子曰九疇之三為八政其一曰食民賴食以生分井授田使之家給人足王政之首務也其二曰貸民資貨以用通商惠工使之有無均濟亦王政所先也其三曰祀生養既遂當思報本則修祈報薦祖考之政行焉其四曰司空養生事神利在安居則造廬舍

築場圃之政行焉其五曰司徒民之逸居不可無教
于是有惇典庸禮之政敷教以化民焉其六曰司寇
教之弗率不可廢刑于是有詰姦禁暴之政明刑以
弼教焉其七曰賓內治畢修外治斯舉乃以賓禮親
邦國而懷侯綏遠之政在是矣其八曰師文德誕敷
武德益振乃以師旅平邦國而除殘靖亂之政在是
矣八者雖有緩急先後人君舉而措之皆所以厚民
生也故曰農用八政要之治內之政六而司寇居後

必教養無備然後不得已而用之也治外之政二而
師居未必邇人安遠人格而後征不庭且用兵尤非
聖人所得已也人主立政之序昭然矣

四五紀一曰歲二曰月三曰日四曰星辰五曰厯數

此一節書是箕子所衍五紀之疇也紀者如綱之有
紀為天時之統紀也箕子曰九疇之四為五紀蓋治
厯以授人時有所以統紀之法其一曰歲天道運行
有一寒一暑之序因之以定四時而成一歲所以紀

天運也歲無不統故居一其二曰月月麗于天有生
明生魄之候因之以定晦朔而成一月所以紀月行
也月統于歲故居二其三曰日日有出沒因之以定
晝夜之長短日有先後因之以定甲乙之次第而日
于是乎可紀矣日統于月故居三其四曰星辰星以
二十八宿為經以五星為緯辰為日月交會之次周
天有十二辰因其經緯次舍而定之而星辰于是乎
可紀矣星辰乃日月之所經行故居四其五曰歷數

月日星辰皆隨天之轉旋以成歲功者其盈縮遲疾
莫不有自然之數焉因其數而制為一定之曆于其
常行則有推步之法于其變動則有占驗之法而歲
月日星辰皆于是乎可紀矣是歷數所以統歲月日
星辰者故居五此五者皆天所垂象以示人而推測
占候定其次序之紀者則人之所以合乎天故曰協
用五紀夫敬天乃勤民之本人主明于協用之道則
術不違天而政不失時此治歷所以為敘彝倫之先

務與

五皇極皇建其有極斂時五福用敷錫厥庶民惟時厥
庶民于汝極錫汝保極

此一節書是箕子所衍皇極之疇也皇君也極者至
極之義標準之名歛集也五福即壽富康寧好德考
終也敷布也錫與也保猶守也箕子曰九疇之五為
皇極其義維何蓋六君一身為天下臣民表率凡綱
常倫理事物言動之間必由乎大中至正極盡其當

然之道立臣民之標準使天下可法可則此所謂建
其有極也夫極建而福自應天祐元吉作善降祥乃
斂集是五福于皇躬矣然豈自私其福哉此至極之
道人人所同有人君又必以此教化天下用皇躬之
極與天下共由之即用皇躬之福與天下共享之而
敷布以錫厥庶民焉由是其時之庶民皆感慕勸趨
于皇建之極勉力為善而自然不敢為惡惟保守至
極之道不敢失墜而民安于下則君身益安于上協

氣旁流清和咸理一似民以此福還錫之君而使之長為至極之標準故曰錫汝保極然則建用皇極尤為九疇樞要而居中五之數也宜矣此極即大學至善之理而建極者即明德新民之止於至善錫福保極壹是皆以修身為本也人君其亦加意修身為民立極使民皆同受其福哉

凡厥庶民無有淫朋人無有比德惟皇作極

此一節書是承上文言保極而歸本于皇之建極也

淫朋邪黨也比德私相比附也算子曰皇極之理雖
通于臣民而倡率之機全係乎主上凡天下之衆民
皆循分守法無有交結淫邪之朋黨以相聚為非在
朝有爵位之人亦皆公忠體國無有黨援比附之惡
德而誣上行私者此豈能無自然而然哉惟大君執中
守正以身作極于上先為萬民之表率百官之儀型
故臣民觀感興起而心術自端趨向自正耳天下臣
民所仰賴之重如此信乎君之不可以不建極也蓋

淫朋比德皆非中正之道則不可與保極孔子釋觀卦之彖辭曰中正以觀天下作極之謂也又曰下觀而化保極之謂也上文言君建極則臣民保極此又言臣民保極由君之作極其歸本于人主者深切著明矣

凡庶民有猷有爲有守汝則念之不協于極不罹于咎皇則受之而康而色曰予攸好德汝則錫之福時人斯其惟皇之極

此一節書是言皇極所以教民之法也。罹猶陷也。受之者容之而不拒也。康安和也。福指爵祿也。箕子曰君能作極于上固足以化尊乎下矣。然人材不同等觀感亦不一致。非隨材而造就之。何以悉納于極哉。凡庶民之中有識足謀慮者。有才堪設施者。有廉潔自守者。皆可備朝廷之錄。用人君所當眷念不忘。敦勉以成就之也。又有中人之資。雖未能自合乎至極之理。亦不敢為非而陷于過惡。此等人進之可與為。

善棄之或流為不善人君當容受而教育之不可輕于拒絕也若此庶民感君念之受之之化乃能勉力進修既見于動容而有安和之色又發于中心而有好德之言是其身心皆漸趨于極人君則當錫以爵祿之福使益知所勸焉將見惟是庶民感發于念受之已深鼓舞于錫福而不倦斯同歸惟皇之極而信能以保極矣皇極之造就乎民者如此觀箕子此言天下無智愚賢不肖莫不可引之于至善之極而教

養以裁成之爵祿以激勸之人主可不加意乎
無虐熒獨而畏高明

此一節書是結言上文教民而引起下文教臣之意也虐輕棄之意熒獨猶云孤寒也高明勢位尊顯者也算子曰人君于天下臣民固當有造就之法尤不可有偏私之心但能勉趨于極而為善雖庶民之微賤者即當念受而錫賚之無以其熒獨為可虐或至忽遺也但有稍悖于極而為不善雖人臣之尊顯者

即當黜罰而懲創之無以其高明為足畏姑且縱恕也夫勸善之典不遺于斃獨則非斃獨者可知人何憚而不為善絀惡之法不恕于高明則非高明者可知人何恃而敢為惡此皇極所以為大中至正而能造就臣民也三代聖王何至有虐斃獨畏高明之事箕子猶為切戒者惟此心易忽一善或棄即是虐不善偶容即是畏則人主造就臣民豈不貴窮理而大

居敬哉

人之有能有為使羞其行而邦其昌凡厥正人既富方
穀汝弗能使有好于而家時人斯其辜于其無好德汝
雖錫之福其作汝用咎

此一節書是言皇極所以教臣之法也人正人俱指
在官之人言羞進也穀善也箕子曰天之生人全材
少偏材多惟有以進之于極則偏者亦全人君不可
不愛養而成就之如人臣之中有優于幹理之能者
有長于措施之為者或以負俗取累或以卑位浮沉

必在上者為之鼓舞振作使益進修其德行將見人
樂自効上輔君以敷錫下尊民以保極而邦國其昌
盛矣然有所資而後勸者中人之情也凡此在官有
能有為之人又必優厚其祿使無以貧窶為憂然後
可責其進行而為善若祿薄而俯仰不給弗能使其
和好于家則是人將以內顧累心且不免于獲罪况
望其進行而為善乎所以祿之不可不富也然富乃
所以養賢非可濫及苟徒以在官之故於其無能無

為而不好德者亦與之以祿則為濫用咎惡之人或
貽害于邦國矣此又人君所當戒也皇極之造就乎
臣者如此夫人臣之義敬事後食箕子言教臣特詳
于養專為人主體臣而發也其亦王道本人情之一
端與

無偏無陂遵王之義無有作好遵王之道無有作惡遵
王之路無偏無黨王道蕩蕩無黨無偏王道平平無反
無側王道正直會其有極歸其有極

此一節書是皇極之敷言所以訓臣民者也無皆禁
止之辭箕子曰王者建極于上既造就其臣民又以
皇極之理衍為訓詞使臣民時時吟咏而自得之其
詞曰皇極之理人人可以遵行但為私心私事所蔽
隔則違而遠之矣凡爾臣民於倫理事物之間其存
諸心者無不中而偏無不平而陂惟遵王者所行之
義而與時皆宜焉無徇私喜而有意為好惟遵王者
所行之道而好所當好焉無徇私怒而有意為惡惟

遵王者所行之路而惡所當惡焉其見諸事者無偏而不中無黨而不公或自流于狹隘試觀王者之道何其蕩蕩然示人廣遠也無不公而黨無不中而偏或自淪于傾險試觀王者之道何其平平然示人坦易也無反而悖常無側而失正或自累于邪曲試觀王者之道何其既正且直示人無私也夫王義王道王路是爾臣民所固有之極果能無偏陂好惡則意念趨向即與皇建之極相為會合矣蕩蕩平平正直

是爾臣民所同有之極果能無偏黨反側則日用常行即與皇建之極相為依歸矣此敷言之訓所以使天下臣民吟咏自得而相與保極者也敷言全乎詩體其詞意優游不迫使人人感發而不能自己周禮太師教六詩殆自箕子此章開之治天下者欲正人心而躋風俗于三代詩教亦曷可廢乎

曰皇極之敷言是彝是訓于帝其訓

此一節書是贊敷言之妙也曰起語辭箕子曰王者

以至極之理敷衍為言而訓誥臣民既以王義王道
王路示會極之趨又以蕩蕩平平正直示歸極之的
反覆著明如此其理則切于斯人彝倫之日用而不
患高遠是天下之常理也其言則為萬世彝倫所取
法而不可移易是天下之大訓也夫理出于天今敷
言純乎天理則是訓也者寧惟人君所自為訓乎其
實乃上帝之訓但上帝不言而人君代之言耳作極
於臣民者慎無忽此言教哉推箕子之言可見人主

體天立極一言一行無不當與天為一凡所以鼓舞萬民即陰陽之化工凡所以教治百官即相協之深意此皇極所由統九疇而居中數中位以為叙彝倫之大本也

凡厥庶民極之敷言是訓是行以近天子之光曰天子作民父母以爲天下王

此一節書是著敷言之效也曰者庶民之言箕子曰敷言之訓合乎天則自感乎人矣凡天下衆民於皇

極之敷言莫不諷誦其辭奉是以為訓因而踐履于
身率是以為行及夫涵濡既久感化益深天子建極
于上其道德固有光華而庶民會歸于下人欲日消
天理日著亦近于天子之光華蓋天子建此至極之
理庶民即會歸此至極之理也當是之時皇極大同
于天下敷錫深洽乎民心愛戴誠而頌聲作皆曰生
我育我莫如父母今天子敷言以訓我民雖父母教
子義方亦不是過非即作民父母乎君我長我實惟

王者今天子敷言以訓我民凡所以勉進曲成既無
弗至斯信為天下王矣夫稱父母以親之稱天下王
以尊之庶民之頌聲若此而羣臣之感化可知所為
保極于無窮而建極之功乃全也大抵皇極一疇皆
修身盡性工夫正所以敘彝倫人主通天下為一身
合天下以成性使臣民有未歸于極即是建極有虧
故箕子言之特詳其為萬世傳治道者切矣

六三德一曰正直二曰剛克三曰柔克平康正直彊弗

友剛克變友柔克沈潛剛克高明柔克

此一節書是箕子所衍三德之疇也克治也友順也
變和也箕子曰九疇之六曰又用三德王者以身建
極雖是一理而治世之德其用有三一曰正直大居
正而不事偏邪之術行直道而不存私曲之意作極
示人無為而治君德之極隆也二曰剛克政貴嚴明
遏惡止慝教先振作興廉立懦剛以法天之健君德
所最尚也三曰柔克政先寬大濟物以恩教貴優容

牖民孔易柔以法地之順亦君德所兼資也三德之
目如此然用之於治則各因其時之所宜焉有如久
道化成人心淳風俗厚此平康之世也人君則以正
直之德治之雖有政教之修而泯乎相克之用與天
下安于保極而已若夫強梗弗順之世則威以奪之
用君之剛德克其習俗之偏于剛使有所畏而趨于
極和柔委順之世則福以予之用君之柔德克其習
俗之偏于柔使有所慕而向于極此齊之以政也至

于沈深潛退之人則揚以進之用君之剛德克其氣
稟之過柔使知勉而企於極焉高亢明爽之人則抑
以退之用君之柔德克其氣稟之過剛使知裁而就
於極焉此化之以教也蓋剛柔之用雖異而納天下
民俗于皇極者固與正直有同歸矣人君欲彝倫之
敘尚無體此三德哉夫惟正直則無所事克至于克
之為用陽舒陰斂其幾甚神然宜剛而剛即正直中
自然之明作宜柔而柔亦正直中自然之惇大則是

德之用有三而人主所以維持皇極總一德之執中也

惟辟作福惟辟作威惟辟玉食臣無有作福作威玉食臣之有作福作威玉食其害于而家凶于而國人用側頗僻民用僭忒

此二節書是言主權不可下移而又切著其戒也玉食珍美之食也側不正也頗不平也僻不公也僭踰也忒過也箕子曰王者欲行撫世之大德必操御世

之大權使非總攬于上而或暗移于下何以盡三德
之用哉爵祿慶賞謂之福奉天命以揚善惟君得以
作之刑罰征誅謂之威奉天討以遏惡惟君得以作
之萬方玉食之供居天位而食天祿亦惟君得以享
之凡在人臣但當奉行君之威福貢獻君之玉食無
敢有竊福市恩假威報怨及僭用玉食者所以上下
均安而國不異政家不殊俗天下賴以長治也若臣
下而敢有作福作威玉食則綱紀陵替大夫必貽患

害于家諸侯必致凶禍于國由是大臣不法則小臣
不廉有位者邪側頗僻而不安其分上無道揆則下
無法守小民亦僭妄過忒而踰越其常矣臣下僭上
之患如此人君可不慎操其權乎蓋權非德不立德
非權不行此又用之要旨也春秋筆削總發明此理
箕子之言所以扶皇極者豈其微哉

七稽疑擇建立卜筮人乃命卜筮

此一節書是箕子所衍稽疑之疇也龜曰卜蓍曰筮

箕子曰九疇之七曰明用稽疑朝廷舉行大事雖由於君心內斷臣民聽順而猶未敢自用也必決其所疑于神或卜龜以觀兆或揲蓍以起卦稽考天命之吉凶以明定人事之趨避謂之稽疑然其要在于得人龜蓍惟至公無私故能紹天明命以通鬼神之情所用以卜筮之人亦必至公無私心與天通而後能傳龜蓍之意人君當於平日選擇其人建立為太卜太筮之官使之專掌其職遇有疑事不決之時乃命

是人或用龜以卜或用蓍以筮然後趨吉避凶之理明而天下之事功可成則明用之大要也蓋天意所在非龜蓍之神物不傳而神物之示意非睿智有德之人亦不能傳人主治天下無事不本于用賢而況於體天地之撰通神明之德者乎

曰雨曰霽曰蒙曰驛曰克曰貞曰悔

此二節書是分列卜兆筮卦之體也箕子曰稽疑者欲明卜筮之用當先詳辨其灼龜觀兆揲蓍起卦之

體焉卜之法用火灼龜因其所食之墨以觀所坼之文其兆與五行相配有滋潤如雨者水之兆也有開朗如霽者火之兆也有蒙昧不明者木之兆也有布散絡驛者金之兆也有交錯相尅者土之兆也五兆之體不同而五行之理寓焉矣筮之法按河圖大衍之數虛其一而不用用蓍草四十有九揲之三變而成一爻十八變而成六爻下三爻為內卦上三爻為外卦合內外二卦乃成一卦內卦曰貞外卦曰悔又

如六爻中有老陰老陽動而變為別卦所謂之卦也
初遇本卦曰貞後變之卦曰悔貞者事之幹內卦遇
卦得之于先皆有正固不移之意悔者生乎動外卦
之卦成之于後皆有變動不居之意蓋值貞悔之卦
體而陰陽之動靜著焉矣卜筮之先辨其體者如此
夫卜兆本于五行筮卦本于陰陽則象數無非實理
之所在曲藝術士之流烏能心通其故乎此筮子所
以首重擇人也

凡七卜五占用二衍忒

此一節書是合著卜兆筮卦之用也衍推也忒過也
箕子曰卜兆筮卦之體總而言之則有雨霽蒙驛克
貞悔之七者分而用之則卜用雨霽蒙驛克之五兆
占用貞悔二象國家欲舉大事或疑其不能無過差
則預用此卜筮推行之審吉凶得失之象決趨避動
靜之宜以期人事之無過差焉是卜筮之體雖異而
稽疑之用則同也然所謂衍忒者推行于未有過差

之先非遲迴顧慮于已然之後吉之理一定兆卦但適如其象亦不能有所加若兆卦示人以凶則當因而改過遷善可見明用之道仍在人主之慎以勅樂而已

立時人作卜筮三人占則從二人之言

此一節書是言卜筮聽斷之要也箕子曰稽疑之法既立是所擇之人以作卜筮之官及當命卜筮時每事必使三人共占之如卜則三人同卜筮則三人同

筮共觀兆卦之吉凶以相參考其同異焉三人皆言吉固可行矣或一人言凶二人言吉則亦從其吉而趨之三人皆言凶固不可行矣或一人言吉二人言凶則亦從其凶而避之因人言之多寡察天意之從違庶乎舉措合宜而過差可免此又用卜筮時聽斷之要也大抵天下事專任一人則識慮或偏並用二人則可否難決三人皆素所擇建必皆賢且智者也又必就其中舍異取同人主公聽竝觀之道亦即此

可槩見矣

汝則有大疑謀及乃心謀及卿士謀及庶人謀及卜筮
汝則從龜從筮從卿士從庶民從是之謂大同身其康
彊子孫其逢吉汝則從龜從筮從卿士逆庶民逆吉卿
士從龜從筮從汝則逆庶民逆吉庶民從龜從筮從汝
則逆卿士逆吉汝則從龜從筮逆卿士逆庶民逆作內
吉作外凶龜筮共違于人用靜吉用作凶

此一節書是正言稽疑之序而并著其應也筮字曰

稽疑之法固當決于卜筮而事理之是非可否人心
原有定見國家大事有行止可疑而未決者必先審
理度勢謀于君心又博咨在朝之卿士又廣詢在野
之庶民則人謀無弗至矣然而未免于有心不若神
物之至公無私尤為可信乃命卜筮之官灼龜以觀
兆揲蓍以玩占質諸神謀而決其從違此稽疑之序
也若此大事君心以為可行則順從矣及其卜之于
龜有吉無凶筮之于蓍有祥無咎卿士無間言庶民

無異議是謂幽明朝野翕然大同何所行而不宜哉
近則福集君身康寧強健遠則福庇子孫遭逢吉慶
大同之應有固然者或君心順從而龜筮皆從雖卿
士庶民逆而未順然君謀合于神謀亦為吉也或卿
士之心從而龜筮皆從雖君心民心逆而未順然臣
謀合于神謀亦為吉也或庶民之心從而龜筮皆從
雖君心臣心逆而未順然民謀合于神謀亦為吉也
倘君心既從而龜從筮逆卿士庶民皆逆雖逆多順

少但著參以人而猶短龜純乎天而更長且與尊上
之謀相合作內之祭祀等事亦吉作外之征伐等事
則凶至若龜兆筮占總與人謀相違雖或君臣上下
皆無所逆而神謀不順則天意可知惟靜以守常乃
吉一動而作為必凶稽疑之應類如此以斷天下之
疑以定天下之業所貴乎人君之明用也蓋皇極之
主無事非奉若天道而龜筮則紹天之明者故稽疑
以神謀為重然必先謀及乃心則窮理格物之學其

可緩乎

八庶徵曰雨曰暘曰燠曰寒曰風曰時五者來備各以其敘庶草蕃廡一極備凶一極無凶

此二節書是箕子所行庶徵之疇也暘日也燠煖也五者指雨暘燠寒風也蕃廡草生豐茂也極備過多也極無過少也箕子曰九疇之八曰念用庶徵蓋以天人一理常相感通五行之氣運于在天皆應乎人事所徵驗者甚衆故謂之庶徵其目維何陰陽之氣

交則蒸潤為雨陰陽之氣清則開霽為陽陰消陽長
則氣煖而為燠陽消陰長則氣冷而為寒陰陽之氣
相虛拂則鼓舞摩盪而為風雨暘燠寒風皆有當然
之節候曰時若此五氣之來全備無少缺又各以其
次敘順應節候而至則協氣旁流品物生殖雖衆草
之至微亦且蕃盛廡茂矣况其他乎若五氣失調節
候舛錯一或極備而傷于太多則陰陽之氣偏勝而
萬物無以育其生必致凶災一或極無而傷于太少

則陰陽之氣偏虧而萬物無以遂其性亦致凶災五
氣之所徵有休有咎如此豈可忽而不察哉要之五
行順布天道所以成歲功也一氣順則五行皆順一
氣乖則五行俱乖人主憲天之道斷無可或偏者也
曰休徵曰肅時雨若曰乂時陽若曰哲時燠若曰謀時
寒若曰聖時風若曰咎徵曰狂恆雨若曰僭恆陽若曰
豫恆燠若曰急恆寒若曰蒙恆風若

此一節書是推言庶徵之本于人事也箕子曰庶徵

雖見于天運莫非人身之所感召也天有雨暘燠寒
風之五氣人有貌言視聽思之五事故五事修于人
則天必有休美之徵各以類應如貌必克恭而能作
肅則貌之德修矣貌澤水也雨亦水之氣其為休徵
則雨澤以時而順應之如言必從理而能作又則言
之德修矣言揚火也暘亦火之氣其為休徵則晴霽
以時而順應之如視無不明而能作括則視之德修
矣視散木也燠亦木之氣其為休徵則和煖以時而

順應之如聽無不聰而能作謀則聽之德修矣聽收
金也寒亦金之氣其為休徵則寒結以時而順應之
如思必通微能睿而作聖則思之德修矣思通土也
風亦土之氣其為休徵則風至以時而順應之五事
不修于人則天必有咎惡之徵各以類應貌不能作
肅失于狂而放蕩其咎徵則為常雨而順應之蓋淫
潦無節類于狂也言不能作又失于僭而差忒其咎
徵則為常暘而順應之蓋亢旱為虐類于僭也視不

能作括失于豫而遲疑其咎徵則為常燠而順應之
蓋和柔氣多類于豫也聽不能作謀失于急而輕躁
其咎徵則為常寒而順應之蓋栗烈氣勝類于急也
思無作聖之德失于蒙而散昧其咎徵則為常風而
順應之蓋晦霾之氣類于蒙也休咎之各以類應若
此然則休咎雖驗乎天惟在人君之慎其所感而已
蓋人君之行事與天地相為流通故行有善惡則氣
各以類應然感應之理非謂行此一事即有此一應

統而言之一德修則凡德必修一氣和則凡氣必和
固不必拘拘為配合之說也惟於天人之際明其自
然之理而得其所以然之故誠身修德以為格天之
本自能名和而致祥矣

曰王省惟歲卿士惟月師尹惟日

此一節書是承上言休咎之徵而示君臣所以念用
也箕子曰庶徵之於五事天人相感應如此治天下
者何以盡其念用之寶哉凡為君為臣皆當隨分隨

時觀其休咎以省察所行之得失王者如天運於上統財成輔相之任其分獨尊猶歲之無所不統也故庶徵休咎惟以係一歲之利害者省驗之焉卿士大臣有調燮贊襄之責其分之統於王猶月之統於歲也故庶徵休咎惟以係一月之利害者省驗之焉師尹衆職有撫辰凝績之責其分之統於鄉士猶日之統於月也故庶徵休咎惟以係一日之利害者省驗之焉蓋因休以省五事之得而益進于交勉因咎以

省五事之失而共惕于增修此念用庶徵之道也抑歲月日相需成運王卿士師尹相資成治其得失所關固一體也箕子特就尊卑分屬之亦見人主之所統者大而上下之貴相濟也與

歲月日時無易百穀用成又用明俊民用章家用平康日月歲時既易百穀用不成又用昏不明俊民用微家用不寧

此二節書是究言休徵之效咎徵之害也箕子曰天

人感應之際君臣不可不交省者誠以休徵之應咎
徵之害皆昭然其不爽也有如和氣順布大而一歲
之間小而一月一日之內雨暘燠寒風各以時至無
變易其常度此休徵也其效何如言乎歲功則農力
齊而地利出百穀因之成熟矣言乎治道則綱紀陳
而禮樂備政治因之修明矣賢才應運而興俊民之
伏處者因以章顯在位矣王者天下為家比戶而安
居者因以共慶平康矣休徵之效其盛如此然必由

五事克修之所致也有如乖氣漸積小而一日一月
之內大而一歲之間雨暘燠寒風所至非時既變易
其常度此咎徵也其害何如以彼百穀則皆不成熟
而饑饉洊臻矣以彼政治則昏亂不明而國事日非
矣當世之俊民則隱遯而自甘微賤矣生民之室家
則流離而莫獲安寧矣咎徵之害不可勝言蓋無非
五事不修之所致也人君果能自省而率卿士師尹
以交修又安在不可轉咎而為休哉夫休徵必歷歲

而成故言大以及小則知省身之倡率自上咎徵即由日而積故言小以及大則知省身之無微可忽其誥誠萬世君臣可謂深切矣

庶民惟星星有好風星有好雨日月之行則有冬有夏月之從星則以風雨

此一節書是言庶民之休咎係乎上也箕星主風畢星主雨箕子曰王及卿士師尹固省驗于歲月日矣至於庶民則其象惟星蓋庶民無職守亦無所省驗

其休咎惟視乎上人之得失如衆星之附于天也凡
星以氣類相感各有所好主風者好風主雨者好雨
亦如庶民之寒者欲衣饑者欲食鰥寡孤獨者欲得
其所而好亦有不齊焉星之在天雖所好各異而其
氣化流行寒暑推遷乃驗于日月之所經行次舍日
至牽牛月由黑道則行冬令日至東井月由赤道則
行夏令是運于天而成歲功者衆星之好所由以遂
也然日之從星不可見而月之從星可見月行東北

入於箕則以箕星所好扇而為風月行西入于畢
則以畢星所好蒸而為雨其必從之者如此而日亦
猶是矣夫天之懸象著明莫大乎日月而衆星其微
者也然必以日月之常行而從星之異好則天道不
言而歲功成王者辨名定分莫貴乎卿士師尹而庶
民其卑者也然必以卿士師尹之常職而從民之異
欲則王道無為而治化洽誠以庶民之欲既遂衣食
足而知禮義斯五事無不修休徵有協應焉耳大學

言絜矩在好惡則人主必當從民之欲而達朝廷之
命令察四方之幽隱以佐從欲之治則鄉士師尹近
民者之責也兩曜順度而風雨時百官舉職而民生
遂庶徵之義大矣哉

九五福一曰壽二曰富三曰康寧四曰攸好德五曰考
終命六極一曰凶短折二曰疾三曰憂四曰貧五曰惡
六曰弱

此二節書是箕子所衍五福六極之疇也富者有廩

祿也康者身安寧者心安也倣好德所好在德也考成也考終命成其善終之正命也凶者不善終短折者不壽也箕子曰疇之九為福極蓋言人之善者天必報之以福而惡者必報之以禍也五福之目一曰壽人多年壽而後能享諸福故先之二曰富財祿充贍所以資生也三曰康寧體無疾厄心無憂患也四曰攸好德所謂心逸日休自求多福也五曰考終命德足致福尤必善終以成其順受之正命乃為福之

備也此五者皆天所以福善人君自勸以建極而斂
福于一身勸臣民以訓行而錫福于天下則嚮用之
道得矣六極之目一曰凶短折遭凶害而夭歿禍莫
大焉二曰疾身所苦也三曰憂心常戚也四曰貧俯
仰無賴也五曰惡過剛則暴也六曰弱過柔則辱也
人君雖萬福攸同猶必凜凜畏懼思所以承福而遠
極且時時以此六極示戒其臣民務登一世于平康
則威用之道得矣天之報人以福極者自昭然其不

爽而執此以勸懲天下則皇極體天之責也故九疇
由是全焉且人主以天地萬物為一體民皆仁壽堯
舜之福也民皆鄙天桀紂之極也故九疇總一建皇
極皇極即所以敘彝倫謂之洪範者範亦聖人人
倫之至而已

日講書經解義卷六


謹案第四十六頁後一行孔子釋觀卦之象辭刊

本脫子字今增

第六十九頁前一行月行西入于畢刊本西下行
南字據漢志刪



金言同善



總校官庶吉士臣侍朝
校對官庶吉士臣邱庭隆
謄錄監生臣侍臣